

ՍՈՒԼԹԱՆԱԿԱՆ ԹՈՒՐԳԻԱՅԻ ՔԱՂԱՔԱԿԱՆՈՒԹՅՈՒՆԸ
ԱՐԵՎԱՏՅԱՆ ՀԱՅԱՍՏԱՆՈՒՄ ԵՎ ՄԵԾ ՏԵՐՈՒԹՅՈՒՆՆԵՐԸ
(XIX դ. 90-ական թվականներ)

ՊՈՂՈՍ ՍԻՄՈՆՅԱՆ

XIX դ. 90-ական թվականներին սուլթանական կառավարությունն ավելի բռնկացրեց արևմտահայության ազգային, սոցիալական ու կրոնական հալածանքները՝ նպատակ ունենալով մասսայական կոտորածներով մեկընդմիջտ «յուծել» Հայկական հարցը: Արգելվեց «հայ» և «Հայաստան» անունների գործածությունը, սանձարձակ գործողություններ ձեռնարկվեցին հայկական եկեղեցու դեմ, ուսումնական հաստատություններից հանվեց հայոց պատմության դասավանդումը: Հայկական գավառներում ամենուր քրիստոնյա պաշտոնյաներին փոխարինում էին մահմեդականներով¹:

Աբդուլ Համիդ II-ի համար արևմտահայության դեմ վճռական գործողությունների ծավալման ուղեցույց դարձավ մեծ վեզիր Մահմեդ Բեամիլ փաշայի կտակ-նամակը, ուր հեղինակը Թուրքիայի ամրապնդման միջոց էր համարում թուրքահայատակ քրիստոնյա ժողովուրդների, մասնավորապես արևմտահայության ֆիզիկական բնաջնջումը: «Եթե Եվրոպիո մասին մեջ մեր ծոցը օձ մը սնուցինք, պետք չէ, որ նույն հիմարությունը ընենք Տաճկաստանի մեջ: Խեղճությունը՝ ջնջել, վերացնելն է այս ամեն տարրերը,— գրում էր նա,— որ օր մը կրնան մեզի նույն վտանգը ծնանիլ: Մենք և Անգլիան Հայաստան բառը ոչ միայն չենք ճանչցիր, այլ այդ անունը հնչող կզակաները պետք է ջախջախենք... Այդ սուրբ նպատակին համար պետք է և պետական իրավունքը կըպահանջե, որ կասկածելի տաղըր անհետ և անճեռ ընելու ենք: Եվ այդ ի գլուխ հանելու համար բան չի պակսիր մեղի. ամեն գործիք պատրաստ ունինք. քուրդ, չերքեզ, կուսակալ, դատավոր, հարկահան, ոստիկան, վերջապես ամեն ինչ: Կրոնական պատերազմ մը կհրատարակենք, և դուրին պատերազմ, այնպիսի ազգի մը դեմ, որ ոչ զենք ունի, ոչ զինվորություն, և ոչ ալ պաշտպան»²: Աբդուլ Համիդ II-ը այդ հրեշավոր ծրագրի իրագործման ընթացքում որպես զենք օգտագործեց նաև քրդական առանձին ցեղերի: Ըստ այդմ՝ Բ. Դուռն կողմից քրդական անհնազանդ ցեղերին զենքի ուժով հպատակեցնելու ավանդական քաղաքականությունը կոորդկ փոփոխության ենթարկվեց և ստացավ սիրաշահելու ու խաղաղ միջոցներով պետության կողմը գրավելու կերպարանք: «Հայկական խնդիրը դուրս գալուց հետո,— ասում էր քուրդ Հուսեյն աղան,— թուրքերը մեծ բարեկամություն սկսեցին ցույց տալ մեզ և մեր ձեռքով կամենում են կրակ բռնել, այդ աշխարհը սրբել հայերից: Դրա համար շատ մեծ աշխատություններ են եղել և լինում են»³: Բ. Դուռն սկսեց դեպի իրեն գրավել քրդական վերնախավին և քրդական առանձին ցեղերի կրոնական մոլեռանդությունը բորբոքել քրիստոնյա հպատակների, հատկապես հայերի հանդեպ⁴, որոնք զինված ջարդարարների առջև մնում էին անպաշտպան⁵: Միա-

¹ Архив внешней политики России (այնուհետև՝ АВІР), ф. «Политархив», д. 1625, л. 2—3.

² «Փորձ», 1879, № 7—8, էջ 204—205:

³ Ա. Թոխմախյան, Մասիս լեռների հարավային ստորոտները, մաս Բ, Թիֆլիս, 1882, էջ 51:

⁴ Э. Ф. На йт, Революционный переворот в Турции, СПб., 1914, с. 37.

⁵ «Положение армян в Турции до вмешательства держав в 1895 г.», М., 1896, с. 38.

ժամանակ թուրքական իշխանությունները կանխամտածված կերպով տարածում էին ստահոդ լուրեր, թե իբր հայերը եվրոպական քրիստոնյա պետությունների միջոցով ձգտում են ձեռք բերել քաղաքական իշխանություն և իշխել քրդերի վրա⁶, որ նրանք քրդերի երդվյալ թշնամիներն են:

Բ. Դուռը, արհեստականորեն բորբոքելով հայ-քրդական հակամարտություններ, աշխատում էր լուծում տալ իր համար շատ կարևոր խնդիրների: Ամենից առաջ ինչ-որ շահով շեղոքացվում էին կառավարության նկատմամբ քրդական անհնազանդ առանձին ցեղերի գործողությունները, և քրդական վերնախավին ու նրան կուրորեն հետևող հետամնաց տարրերին կառավարությունն օգտագործում էր որպես զենք՝ արևմտահայության դեմ: Մյուս կողմից բանն այնպես էր ներկայացվում, որ դա ոչ թե թուրքական կառավարության հակահայկական քաղաքականության դրսևորում էր, այլ հայ-քրդական հակամարտությունների հետևանք: Թուրքական կառավարության քաղաքականության այդ մոլթ ծալքերը նկատի ունենալով՝ Մ. Մակկոլը գրում էր. «Քրիստոնյաների ջարդը Օսմանյան կայսրությունում կատարվում էր պարբերաբար, ոչ որպես տեղական ֆանատիզմի պայթյունի հետևանք, այլ քաղաքական ակտ, կապված որոշ սխտեմի հետ և կատարվում է մշտապես սուլթանի ու նրա խորհրդականների հրամանով ու ներշնչմամբ»⁷:

Բ. Դուռը, ձգտելով ավելի խորացնել արևմտահայության տնտեսական քայքայումն ու հարստահարությունները, 1877—1878 թթ. ուս-թուրքական պատերազմից հետո ձեռնամուխ եղավ Արևմտյան Հայաստանում և կայսրության մյուս հայաշատ վայրերում մահմեդական վաչկատուն ցեղերի վերաբերման կենցաման գործին⁸: Բարեկեցիկ կյանքի մեծ խոստումներ տալով, սակայն, իրականում, գաղթականների կյանքի ու ապրուստի մասին ամենևին հոգ չբտանելով, կառավարությունը նրանց դիմում էր և ուղղում հայերի դեմ: Մահմեդական վերաբնակները հոծ խմբերով, թուրքական պաշտոնյաների ուղեկցությամբ, շարժվում էին Արևմտյան Հայաստանի խորքերը: «Կարգի պաշտպան» ուղեկցորդ պաշտոնյաներն իրենց աչքերը փակում էին մահմեդական վերաբնակների կողմից հայերի կողոպուտի առջև, օգնում և օրինականացնում նրանց գործողությունները: Ջարդերը դարձել էին առօրյա գործ: Սովետական պատմաբան Գ. Բոնդարևսկին մահմեդական վերաբնակիչների կողմից թըշվառ վիճակի հասցված արևմտահայության անելանելի կացության մասին գրում է. «Սուլթանի կառավարության ցուցումով հայերը ենթարկվում էին վերաբնակիչների ամենադաժան բռնություններին, կոպիտ ու լկտի հետապնդումներին»⁹: Վերաբնակները հիմնավորվում էին հայկական գյուղերում¹⁰, դավթում հայերի հողերը, մինչդեռ հողագործիկ հայ ազգաբնակչությունը պետք է հողային հարկ վճարեք տերությանը¹¹: Ի. Ժեկմենը զայրույթով նշալակում էր թուրքական կառավարությանը, որը Արևմտյան Հայաստանի գավառները լցրել էր «վայրի հորդաներով և ինքը նրանց առջև դրել էր երկընտրանք՝ ապրել թալանով ու կողոպուտով, կամ ոչնչանալ աղքատությունից»¹²: Այդ բարբարոսների համար հայերն անխնա հողոտման առարկա էին, քանի որ «հայը որպես քրիստոնյա զենք կրելու իրավունք չունենալ»¹³: «Հայերին կարող էին ճնշել ու կողոպտել բոլոր նրանք,— գրել է Ի. Գոլդբորոգոն,— ովքեր դրա համար բա-

⁶ Լևոն, Թուրքահայ հեղափոխության գաղափարաբանությունը, հ. Ա, Փարիզ, 1934, էջ 117:

⁷ «Положение армян в Турции до вмешательства держав в 1895 г.», М., 1896, с. 173.

⁸ «Правительственный вестник», 1880, № 199.

⁹ Г. Л. Бондаревский, Багдадская железная дорога и проникновение германского империализма на Ближний Восток (1888—1903 гг.), Ташкент, 1955, с. 60.

¹⁰ «Новое время», 31. V. 1913.

¹¹ «Положение армян в Турции до вмешательства держав в 1895 г.», с. 62—63.

¹² Նույն տեղում, էջ 57—68:

¹³ «Մշակ», 1879, № 74:

վականին ուժ ունեին»¹⁴, իսկ սուլթանական կառավարությունը «մասնակից էր շարագործների արարքներում»¹⁵, «աստիճանաբար ոչնչացնում էր անդին հայերին»¹⁶: Այսպիսով, «այն ավազակությունները, որ առաջ անհատական բռնույթ ունեին,— դրեւ է շ. Աճառյանը,— այնուհետեւ կազմակերպված պատուհասներ դարձան հայ ժողովրդի գլխին»¹⁷:

1880, 1886¹⁸, 1895¹⁹ թթ. թուրքական կառավարությունը կատարեց հաշկերով խիտ բնակեցված նահանգների կամայական վերաբաժանում, նպատակ ունենալով հայերով խիտ բնակեցված մարզերը մասնատել, միավորել մահմեդականներով բնակեցված վայրերի հետ և այդպիսով ապահովել մահմեդական ազգաբնակչության թվական գերակշռությունը հայերի նկատմամբ, բացառել բարենորոգումների խնդիրը:

1891 թ. Արդուլ Համիդ II-ը ռուս-թուրքական սահմանի իրկարույթյամբ կազմակերպեց քրդական «Համիդիե» անկանոն զենդեր, որոնք ռուս-թուրքական պատերազմների ժամանակ ծառայելու էին որպես ռուսների դեմ զորական ուժ, իսկ խաղաղ պայմաններում՝ իբրեւ հայ ազգաբնակչության ֆիզիկական բնաջնջման գործիք²⁰: «Համիդիե» զենդերն 1894 թ. հուլիս-օգոստոսին օգտագործվեցին Սասունում, երբ կոտորվեց ինքնապաշտպանության ելած սասունցիների դիմադրությունը և թուրքական կանոնավոր բանակի ղինվորների ակտիվ մասնակցությամբ իրադրոժվեց կենտրոնական կառավարության կողմից Սասունի հայության պլանավորված հրեշավոր կոտորածը: Սասունի հայ ազգաբնակչության դաժան հաշվհարդարին հաջորդեցին զանգվածային կոտորածներն ամբողջ Արևմտյան Հայաստանում²¹: Թուրքական իշխանությունները և մահմեդական հոգևորականները մի կողմից զինում էին մուսուլման ամբոխին ու հայերին կոտորելու ցուցում տալիս²², իսկ մյուս կողմից ջանում էին հանգստացնել հայերին, թե իբր «կոտորածի մասին լուրերը կեղծ են»²³: Հակառակ նման հավաստիացումների, 1895 թ. սեպտեմբերին ողջ Արևմտյան Հայաստանը, ինչպես նաև բուն Թուրքիայի հայաբնակ մյուս վիլայիթները վերածվեցին սպանդանոցի²⁴:

Կոտորածը սկսվեց 1895 թ. սեպտեմբերի 26-ին, Տրապիզոնում թուրքական պաշտոնյայի վրա երկու ծպտյալ անձանց պրովոկացիոն հարձակումից հետո²⁵: Սեպտեմբերի 27-ին և 30-ին կոտորածներ տեղի ունեցան Նիկոմեդիայում և Բաբերդում²⁶, Հոկտեմբերի 14-ին սկսվեց Շապին-Պարահիսարի ու նրա շրջակա գյուղերի, իսկ հոկտեմբերի երկրորդ կեսին՝ Մարաշի, Խարբերդի, Կարինի հայերի կոտորածը²⁷: Զարդարաբական դործողություններն ավելի մեծ չափեր ընդունեցին ու նոր ուժով կրկնվեցին Տարոնում²⁸ և Սեբաստիայում²⁹:

14 И. И. Голобородко, Старая и новая Турция, СПб., 1908, с. 222.

15 Ա. Կիտուր, Հնչակյան գլխավոր ցույցերը, Բեյրութ, 1954, էջ 117:

16 «Русская мысль», 1892, кн. 7, с. 51.

17 Հ. Աճառյան, Տաճկահայոց հարցի պատմություն, Նոր Նախիջևան, 1915, էջ 18—19:

18 А. И. Гиппиус, Статистические таблицы вилайетов турецкой империи, ближайший к Закавказью, Тифлис, 1889, с. 11—14.

19 «Մշակ», 1895, № 54:

20 «Положение армян в Турции до вмешательства держав в 1895 г.», М., 1896, с. 329—332.

21 ՀԱՅԱՍՏԱՆԻ պատմության ինստիտուտի արխիվ, ց. 1, գ. 132, թ. 15:

22 Նույն տեղում, գ. 146, թ. 1:

23 Նույն տեղում, գ. 151, թ. 2:

24 Նույն տեղում, գ. 139, թ. 14:

25 Նույն տեղում:

26 Նույն տեղում:

27 Նույն տեղում, թ. 11—12:

28 Նույն տեղում, գ. 157, թ. 1—16:

29 Նույն տեղում, գ. 153, թ. 1—6:

Բիթլիսում հոկտեմբերի 12-ին սկսված կոտորածը տարածվեց ամբողջ շրջակայքում, որի ընթացքում ավերակների վերածվեցին 38 հայկական գյուղեր, զոհվեց շուրջ 800—1000 հայ³⁰, Հաճնում, Մարաշում, Ուրֆայում հայերի կոտորածը սկսվեց 1895 թ. հոկտեմբերի առաջին օրերին: Ուրֆայում հայերը դիմեցին ակտիվ ինքնապաշտպանության, բայց ղենքի ու զինամթերքի անբավարարության հետևանքով երկար դիմադրել չկարողացան³¹, Այնուհետև մասսայական ջարդեր տեղի ունեցան Սվադում, Ուտհայում, Դիարբեքիրում³²:

Թուրքական կառավարությունը երկար ժամանակ նախապատրաստվում էր վճռական հարված հասցնել նաև Զեյթունի հայությունը, որը բազմիցս պայքարի էր ելել իր ազատագրության համար: Անվերջ հարստահարությունները և կաղմակերպված կոտորածները հայերին հարկադրեցին դիմելու ապստամբության³³, Ապստամբության նախապատրաստումը սկսվեց 1895 թ. հուլիսից, իսկ բուն գործողությունները ծավալվեցին նույն թվականի օգոստոսից և տևեցին մինչև 1896 թ. հունվարը³⁴, Մեծ գերակշռություն ունեցող թուրքական բանակներն անվերջ պարտություններ էին կրում: Դեպքերին միջամտեցին մեծ տերությունների հյուպատոսները և նրանց մասնակցությամբ թուրքական իշխանություններին ու ինքնապաշտպանությանը դիմած ապստամբների միջև տեղի ունեցան բանակցություններ: Երկու կողմերի փոխադարձ զիջմամբ ի վերջո կնքվեց համաձայնագիր, որով թուրքական իշխանությունները պարտավորվում էին Զեյթուն ուղարկել քրիստոնյա կառավարիչ, տեղում պաշտոնյաներն ընտրվելու էին զեյթունցիներից, բնակչությունը հինգ տարով ուղատվում էր հարկերից:

Հաղթական ապստամբության միջոցով զեյթունցիները միառժամանակ խույս տվեցին կոտորածից, սակայն սուլթանական կառավարության խարդավանքները շարունակվում էին: 1896 թ. վաղ գարնանը «Համիդիե» զնդերն իրենց ավերիչ գործողությունները սկսեցին Վասպուրականում: Վանում Ֆիրտ Սադետին փաշան տեղի հայության դեմ միասնական գործողությունների պլան էր նախապատրաստում: Հայ ազգաբնակչությունը դիմեց ինքնապաշտպանության³⁵, սակայն ուժերն անհավասար էին: Մարտերում զոհվեց 700 հայ, Ավելի ողբերգական եղավ Վասպուրականի գյուղական բնակչության վիճակը: «Համիդիե» զնդերը և մահմեդական խաժամուժը հայ բնակչությանը կոտորում էին վայրագ մոլեռանդությամբ³⁶:

1896 թ. հունվար-օգոստոսին սուլթանական կառավարությունը եվրոպական տերությունների հետ դիվանագիտական խաղերի ընթացքում արևմտահայության դեմ կազմեց նոր, ընդարձակ գործողությունների պլան: Արևմտյան Հայաստանում և կայսրության հայաշատ միլայեթներում կրկին տեղի ունեցան մեծ ջարդեր: Կ. Պոլսում կոտորածի ընթացքում թուրք դահիճները հատուկ սպիներով հավաքում էին դիակները, դրանք թաղում փոսերում կամ նետում Մարմարայի ալիքների մեջ: Երեք օր տևած կոտորածներին զոհ գնաց 10000 մարդ³⁷: Սուլթանը այդ կոտորածով նպատակ ուներ «թուլացնել հայ ժողովրդի դերը Կ. Պոլսի տնտեսական և կուլտուրական կյանքում,— գրել է

³⁰ Նույն տեղում, գ. 145, Բ. 3—5:

³¹ Նույն տեղում, գ. 133, Բ. 18:

³² «Братская помощь пострадавшим в Турции армянам», М., 1898, с. 101—102.

³³ ՀՄՍՀ ԳԱ պատմության ինստիտուտի արխիվ, ց. 1, գ. 73, Բ. 43—44:

³⁴ Հ. Մ. Պողոսյան, Զեյթունի պատմությունը, Երևան, 1968, Վ. Գ. Մելիքսեբյան, Զեյթունի հերոսական ապստամբությունը, Երևան, 1962, «Русская мысль», 1899, кн. 3, с. 26—36.

³⁵ «Հուլիսի Արմենակ Եկարյանի», Գահիրե, 1947:

³⁶ Ա-դ. Պ, Վանի, Բիթլիսի, էրզրումի միլայեթները, Երևան, 1912, էջ 18:

³⁷ А. Тиркова, Старая Турция и младотурки, Пг., 1916, с. 75.

ծ. Սարգսյանը, — զրկել հայ ազգաբնակչությանը նրա առաջավոր ու ղեկավար մասից»³⁸:

4. Պոլսից հետո Արևմտյան Հայաստանի բոլոր վիլայեթներում հայերի ջարդերը կրկնվեցին³⁹, 1890-ական թվականների ջարդերը հայ ժողովրդից խլեցին 300.000—350.000 զոհ⁴⁰: Տասնյակ հազարավոր արևմտահայեր բռնազաղթեցվեցին և ցրվեցին եկան աշխարհով մեկ, նրանցից շատերը ապաստան գտան ուսական կայսրությունում:

Սուլթանական կառավարության կողմից հայերի զանգվածային կոտորածների սանձադեբման համար հաճախակի առիթ էին ընձեռում մեծ տերությունները, որոնք աշխատում էին Հայկական հարցն օգտագործել Թուրքիայում իրենց ազդեցության ամրապնդման համար:

XVIII և XIX հարյուրամյակներում Ռուսաստանի և Թուրքիայի միջև մղված պատերազմների ընթացքում օբյեկտիվորեն պայմաններ էին ստեղծվում թուրքական դաժան լծի տակ տառապող քրիստոնյա ժողովուրդների ազատագրության համար⁴¹: Այդ գիտակցությամբ էր թելադրված այն իրողությունը, որ թուրքահպատակ քրիստոնյա ժողովուրդներն իրենց ազատագրության «մեսիան սպասում էին Պետերբուրգից»⁴²: XIX դ. 80—90-ական թվականներին ցարիզմի մերձավորարևելյան քաղաքականության մեջ, հետևաբար նաև Հայկական հարցում, տեղի ունեցավ փոփոխություն՝ կապված արտաքին քաղաքականության ծանրության կենտրոնը Հեռավոր արևելք տեղափոխելու հետ, որտեղ իմպերիալիստական հզոր պետությունների միջև կատաղի պայքար էր ծավալվում Չինաստանի բաժանման համար: Այդ վայրերում ավելի վճռական հանդես գալու նպատակով ցարիզմը ժամանակավորապես հրաժարվեց Թուրքիայի status quo-ի խախտման քաղաքականությունից, ավելի տանելի համարելով իր սահմանների հարևանությամբ ունենալ թույլ Թուրքիա, քան նրա տարածքի որոշակի մասը ստացած արևմտյան որևէ հզոր տերություն⁴³: Չնայած ցարիզմը չէր ցանկանում Հայկական հարցը դարձնել միջազգային քննարկման խընդիր⁴⁴ ու Մերձավոր արևելքում այդ կապակցությամբ լուրջ դժվարությունների տեղիք տալ, սակայն Արևմտյան Հայաստանի գրավման նպատակն օրակարգից չէր հանված⁴⁵: Վ. Ի. Լենինը ցարիզմի արտաքին քաղաքականության այդ կողմը նկատի ուներ, երբ նշում էր, որ «ցարիզմը կգերադասեր, իհարկե, սկզբում լիովին ջախջախել Գերմանիային, որպեսզի «վերցնի» հնարավորին չափ շատ՝ թե ամբողջ Գալիցիան, թե ամբողջ Լեհաստանը, թե ամբողջ Հայաստանը... Բայց ակներև է, որ ուժերը չեն պատում»⁴⁶: Այդ փուլում ցարիզմի գլխավոր խնդիրը սուլթանի վրա ազդեցության ամրապնդման միջոցով մյուս մեծ տերություններին Մերձավոր արևելքից դուրս մղելն էր⁴⁷: Այդ պատճառով էլ 1895 թ. ցարիզմը խուսափեց պաշտպանել Արևմտյան Հայաստանում նախատեսվող բարենորոգումների նախագիծը, որն առաջադրվել էր անգլիական կառավարության կողմից և հեռուն գնացող նպատակներ էր հետապնդում: Ցարիզմը ժամանակին կռահեց բրիտանական դիվանագիտության նենգա-

38 Е. К. Саркисян, Политика Османского правительства в Западной Армении, Ереван, 1972, с. 150.

39 АВПР, ф. «Политархив», д. 3460, лл. 32—35.

40 Նույն տեղում, էջ 31:

41 Զ. Տ. Գրիգորյան, Արևելյան Հայաստանի միացումը Ռուսաստանին և նրա պատմական նշանակությունը, Երևան, 1978, էջ 332—333:

42 К. Маркс и Ф. Энгельс, Соч., т. 9, с. 9.

43 «Историк марксист», т. 20, М., 1930, с. 102.

44 АВПР, ф. «Политархив», д. 3435, лл. 51—52.

45 АВПР, ф. «Секретный архив министра», 14.1.13/25.8. 1897, л. 3.

46 Վ. Ի. Լենին, ԵԼԺ, հ. 30, էջ 233:

47 В. М. Хвостов, История международных отношений 1871—1917 гг., т. 1, М., 1947, с. 20.

միտ քայլի նպատակը, ըստ որի ռուսական սահմանի հարևանությամբ ստեղծված հայկական ինքնավար մարզը դրվելու էր արևմտյան պետությունների, առաջին հերթին Անգլիայի հովանավորության տակ և վերջինիս կողմից վերածվելու էր Ռուսաստանի դեմ պայքար ծավալելու մրցասուպարեզի։ Այդ պատճառով էլ ցարական կառավարությունն իր դաշնակից Ֆրանսիայի հետ հակադրվեց Անգլիայի ծրագրին։

Սակայն Արևմտյան Հայաստանի հարցում ցարական կառավարության XIX դ. 90-ական թվականներին բռնած դիրքի դեմ ծառացել էր Ռուսաստանի դեմոկրատական հասարակական միտքը։ Հայկական հարցի նկատմամբ ցուցաբերած վերաբերմունքում առավել ցցուն դրսևորվեցին երկու ռուսաստանների իրարամերժ դիրքորոշումները, ցարիզմի ռեակցիոն քաղաքականության դեմ ռուս դեմոկրատական հասարակայնության անհաշտ պայքարը և վերջինիս ջերմ ու հոգատար վերաբերմունքը, նյութական ու բարոյական ակտիվ օգնությունը սուլթանական քաղաքականության զոհը դարձած արևմտահայությանը⁴⁸։ Ռուս հումանիտ զործիշներ Յու. Վեսերվսկին, Ա. Կոմարովսկին, Ա. Գրենը, Վ. Գոլմստերմը, Ա. Սիրոմյատնիկովը, Կ. Նոտովիչը, Ա. Սազոնովը, Ի. Գորենկոն իրենց ձայնը բարձրացրին, կոչ անելով օգնության ձեռք մեկնել արևմտահայությանը։ Նրանց ջանքերով հրատարակվեցին «Շրբալսրական օգնություն թուրքիայում տուժված հայերին» և «Հայերի դրությունը թուրքիայում մինչև 1895 թվականին տեղությունների միջամտությունը» ժողովածուները, որոնք ռուս ընթերցողին իրազեկ էին դարձնում հայ ժողովրդի ողբերգությունը։ Լրագրող Ն. Գորենկոն հեռավոր Սիբիրից իր ձայնը հնչեցրեց հօգուտ արևմտահայության։ «Հաղարամյակների խորքից եկող հայ ժողովրդի օգնության կանչն է լսվում բիրլիական Արարատի բարձունքներից,— գրում էր նա,— Մահմեդական ֆանատիզմը մոլեգնում է իր ողջ մոլուցքով։ Բարի և հզոր Ռուսիա, բարձրացրու ջո արդար ձայնը ձայնը և փրկիր ջո հավատակիցներին»⁴⁹։ Միևնույն ժամանակ ջերմությամբ և ակտիվ օգնության զգացումով էին տոգորված Կիևի համալսարանի ռուսաց պատմության ամբիոնի ղոցենտ Ա. Գրենի՝ հայ ժողովրդի պատմությանը նվիրված գործերը⁵⁰, Հրապարակախոս Վ. Գոլմստերմը «Շրբալսր հայեր» հոդվածում գրում էր. «Ռուս ընթերցող, ջո ձայնն անհրաժեշտ է, ըանի որ մեր բոլորի ձայնը միասին կազմում է հասարակական կարծիքը, Ռուսաստանի ձայնը, որը կեղծ չպետք է հնչի։ Քո համագործակցությունը անհրաժեշտ է ոչ միայն հայերին նյութական օգնության ցույց տալու, այլև Ռուսաստանի հասարակական կարծիքը կեղծ ուղղությամբ դեպի ճշմարիտ շեղելու համար»⁵¹։ Ռուսական առաջադեմ հասարակայնության ճնշումը պաշտոնական մամուլի մի շարք օրգանների («Ս. Պետերբուրգսկիյ վեդոմոստի», «Ռուսսկիյ վեդոմոստի», «Պուտիսելստվեննիյ վեստնիկ») ստիպեց իրենց տոնը մեղմացնելու հայ ժողովրդի նկատմամբ։

Մերձավոր արևելքում, ինչպես նաև Հայկական հարցում ցարիզմը և ֆրանսիական կառավարությունն ընթանում էին գիրկընդխառն⁵², չնայած աշխարհամասի այդ հատվածում ռուս-ֆրանսիական ակնհայտ հակամարտություններին։ Եթե դեպի Բալկանների խորքը Ռուսաստանի առաջխաղացումն Ավստրո-Հունգարիային նետեց Գերմանիայի գիրկը, ապա Եվրոպայի կենտրոնում Գերմանիայի հզորացումը Ֆրանսիային մղեց Ռուսաստանի կողմը⁵³։ Դեկավարվելով իրենց իմպերիալիստական շահերով, ֆրանսիական կառավարող շրջանները հայկական մասսայական կոտորածների ժամանակ բռնեցին թուրքիային

⁴⁸ ՀՍՍՀ ԳԱ «Լրագր», 1980, № 10, էջ 15—24.

⁴⁹ «Сибирский вестник», 1897, № 17.

⁵⁰ «Россия и Азия», 1898, № 15—16.

⁵¹ «Братская помощь пострадавшим в Турции армянам», с. 3—4.

⁵² «Die Grosse Politik Europaischen Kabinette» (այնուհետև՝ D. G. P. E. K.), Bd. IX, Berlin, 1924, № 2855.

⁵³ К. Маркс и Ф. Энгельс, Соч., т. 22, с. 44.

հովանավորելու գիծ, որովհետև Թուրքիայի status quo-ի պահպանումը թույլ կտար նրա էկոնոմիկայում ապահովել ֆրանսիական կապիտալ ներդրումների անվտանգությունն ու եկամուտները⁵⁴։ Ի հակադրություն պաշտոնական շրջանների՝ ֆրանսիական առաջադեմ մտածողները նույնպես իրենց ձայնը բարձրացրին հօգուտ արևմտահայության⁵⁵։

1894—1897 թթ. մերձավորարևելյան ճգնաժամի ընթացքում Անգլիան քաղաքական նկատառումներով Հայկական հարցում ավելի մեծ ակտիվություն ցուցաբերեց։ Ինչպես դարի 80-ական թվականներին, երբ Անգլիայի ազդեցությունը Թուրքիայում շատ մեծ էր, այնպես էլ 90-ական թվականներին բրիտանական կայսրության մերձավորարևելյան քաղաքականության բնագավառում Հայկական հարցն օգտագործվում էր որպես միջոց՝ սուլթանի վրա ճնշում գործադրելու և նրանից շահավետ գիշտումներ կորզելու համար։ Անգլիան ամեն կերպ աշխատում էր սուլթանին վախեցնել հայկական ինքնավար մարզի ու հայկական ռաբնտրոգումների ուղղակի անվտանգությանը։ Հարկավ, անգլիական կառավարող շրջաններին ամենևին չէր մտահոգում սուլթանական ջարդարարների զոհը դարձած արևմտահայության ողբեցական վիճակը։ Խորամանկ Ալբրիտը ձգտում էր այդ ճանապարհով վերականգնել ու ամրապնդել Թուրքիայում իր հրեմանի ազդեցությունը։ Անգլիայի հանցապարտ մեղսակցությունը Հայկական հարցում հետագայում հարկադրված եղան խոստովանել անգամ անգլիական պետական գործիչները⁵⁶։

Հայկական հարցը XIX դ. 90-ական թվականներին դարձավ նաև կայզերական Գերմանիայի զիմանագիտությանը զբաղեցնող խնդիրներից մեկը։ Գերմանիան ձգտում էր Թուրքիայում իր քաղաքական ու տնտեսական գերիշխանությունը հաստատելու համար խճճել մյուս տերությունների հարաբերությունները⁵⁷, նրանց հակադրել միմյանց և դուրս մղել Մերձավոր արևելքից։ Այդ նպատակով գերմանական զիմանագիտության կողմից կատարվում էր Թուրքիան Գերմանիայի և Ռուսաստանի միջև բաժանելու հրապուրիչ, սակայն խաբուսիկ առաջարկը, ինչպես նաև ակնարկն այն մասին, թե Անգլիայի դեմ Ռուսաստանի վճռական գործողությունների դեպքում Գերմանիան երաշխավորում է Ավստրո-Հունգարիայի չեղոթությունը⁵⁸։ Թուրքիայում իր ազդեցությունը հաստատելու նպատակով 1894—1896 թթ. հայկական կոտորածների ամենահոռն շրջանում Վիլհելմ II-ը ճանապարհորդություն ձեռնարկեց դեպի Մերձավոր արևելք։ Նա հայտարարեց սուլթանին և նրա հպատակ մահմեդականներին իր պաշտպանության տակ վերցնելու մասին⁵⁹, դարձավ Արդու Համիդի բարեկամը, Թուրքիայի խնամակալը⁶⁰։ Եթե մեծ տերությունների համար սուլթանի վրա ազդեցություն ձեռք բերելը շատ կարևոր քաղաքական և զիմանագիտական հարց էր, ապա սուլթանին երբեք էլ չէր հետաքրքրում, թե նրանցից որն էր լինելու իր հովանավորը։ Նրան անհրաժեշտ էր նրանցից մեկի պաշտպանությունն ընդդեմ մյուսների, մի նեցուկ, որը հեշտացներ քրիստոնյաների և մանավանդ հայության դեմ ոճիրներ գործելը։

Հայկական մասսայական կոտորածների ընթացքում Գերմանիան ձեռքնապահ մնաց ու հրաժարվեց մասնակցել ինչպես Սասունում հետաքննական հանձնաժողովի, այնպես էլ հայկական ռեֆորմների նախագծերը կազմելու աշխատանքներին։ Վիլհելմ II-ը նամակով արյունաբերու սուլթանին խրախուսում

54 Е. К. Саркисян, *изд. аш.*, էջ 186—192։

55 «Ենդոպագիների կարծիքը հայկական դատի մասին», Ժնև, 1907։

56 Герцог. Арга йлскнй, Ответственность Англии в Восточном вопросе, СПб., 1909, с. 173; Ллойд Джордж, Правда о мирных договорах, т. 2, М., 1957, с. 390.

57 Мелик Каракозов, Выступление Германии в Турции после великих армянских погромов, Тифлис, 1915, с. 13.

58 «Красный архив», т. IV, М., 1931, с. 87.

59 Г. Халгартен, Империализм до 1914 г., М., 1961, с. 230.

60 А. Норден, Уроки германского империализма, М., 1948, с. 13.

էր աներկյուղ գործել, ցուց տալ, որ «իներ հանդիսանում է Ալլահի ստվերը երկրի վրա»⁶¹, Գերմանական դիվանագետները շտապում էին սուլթանին խորհուրդ տալ անպատիժ հաշվեհարդար տեսնել հայերի նկատմամբ⁶², Այդ հանգամանքը նկատի ունենալով՝ Ռենե Բինոնը գրում էր. «Հայկական կոտորածների ընթացքում, եթե գործադրությունը թուրքական է, մեթոդը գերմանական ցուց տրված է»⁶³, Գերմանիան թուրքիայում պայքար մղելով ընդդեմ ռուսական ազդեցության, պայքարի սլաքը առաջին հերթին ուղղում էր արևմտահայության դեմ՝ գտնելով, որ հայերով բնակեցված Հայաստանը խիստ վնասանգամ էր Գերմանիային⁶⁴, «Գերմանիան Հայաստանում հայերի բնաջնջման մեջ քաղաքական շահ ունեւր»⁶⁵, — իրավացիորեն ընդգծում էր Ռ. Բինոնը։ Գերմանիայի կառավարող շրջաններն անմարդկային դատաւարւթյամբ դիտում էին հայկական կոտորածները և, շնայած մինչև 1896 թ. ամռան կոտորածները թուրքական կառավարության մտադրութլունները հայտնի էին գերմանական դիվանագիտութլանը⁶⁶, գերմանական կառավարութլունը ոչ մի միջոց չձեռնարկեց հակադր կոտորածները կանխելու համար։ Ավելին, Կ. Պոլսում գերմանական դեսպան Ֆոն Զաուրման սուլթանին առաջարկում էր իր տերութլան հովանավորութլունը՝ հայերի բնաջնջումը համարելով նրա իրավունքը⁶⁷։ Այսպիսով, Գերմանիան հանուն իր իմպերիալիստական շահերի Մերձավոր արեւելքում ատրիճանաբար դառնում էր Արդուլ Համիդի շարդարարական քաղաքականութլան նեցուկը։ Նրա թողտվութլունը սուլթանին ավելի վրաստաւ ու վճռական էր դարձնում արեւմտահայութլան դեմ արյունալի գործողութլուններ ծավալելիս։

Վիլհելմ II-ի հակահայկական քաղաքականութլունը բազմիցս քննադատվել է գերմանական ազատամիտ մտավորականութլան կողմից։ Առաջադեմ գործիչ Գ. Բրանդեսը, օրինակ, իր բազմաթիվ հրապարակային ելուլթներում բացահայտում էր Արեւմտյան Հայաստանում տիդի ունեցող ջարդերի ծանր հետեանքները, թուրքական ֆանատիկ ամբոխի ու շինուլթիկներն անմարդկային, բիրտ գործողութլունները։ Նա անխնա քննադատութլան էր ենթարկում Վիլհելմ II-ին, որի հովանավորութլամբ սուլթանն իրագործում էր տասնյակ ու տասնյակ հազարավոր հայերի կոտորածը։ «Գերմանիայի բարեկամական հարաբերութլունները թուրքիայի հետ, — գրում էր Գ. Բրանդեսը, — վերջինիս սովեց ազատ օդ շնչելու հնարավորութլուն...։ Այժմ ավելի շատ, քան առաջ, սկսեց արյուն հոսեցնել, բռնութլամբ ու արյունով ստիպեց հայերին լռել»⁶⁸։

Ավստրո-Հունգարիան, պայքարելով բալկանյան ժողովուրդների ազգային-ազատագրական շարժումների դեմ, թշնամանքով էր վերաբերվում նաեւ արեւմտահայութլան ազատագրական շարժումների նկատմամբ, վախենալով, որ հայկական հուղումները իրենց արձագանքը կգտնեն սլավոնական ժողովուրդների միջավայրում, որոնք նույնպես ազատագրական պայքարում կողմնորդվում էին դեպի Ռուսաստանը⁶⁹, 1894—1896 թթ. հայկական կոտորածների ընթացքում Ավստրո-Հունգարիան վախենում էր անգլո-ռուսական մերձեցումից և նեղուցները Ռուսաստանի ձեռքն անցնելու հնաւեկարից։ Նլնելով դրանից, Ավստրո-Հունգարիան նույնիսկ պատրաստ էր Արեւմտյան Հայաստանում

61 Ա. Ամֆիտեատրով, Եվրոպա և Հայաստան, Թիֆլիս, 1906, էջ 107։

62 D. G. P. E. K., Bd. XII, № 3092.

63 Ռենե Բինոն, Հայերու բնաջնջումը, Կ. Պոլիս, 1919, էջ 5։

64 «Международные отношения в эпоху империализма», серия III, т. I, М., 1931, с. 175.

65 Ռենե Բինոն, նշվ. աշխ., էջ 6։

66 D. G. P. E. K., Bd. XII, № 2832.

67 Նույն տեղում, № 2891։

68 Г. Брандес, Армянский вопрос, Астрахань, 1906, с. 23.

69 D. G. P. E. K., Bd. X, № 10.

ռեֆորմների հարցի շուրջը համաձայնության գալու Անգլիայի հետ ընդդեմ Ռուսաստանի⁷⁰, Ինչպես մյուս տերությունների, այնպես էլ Ավստրո-Հունգարիայի համար Հայկական հարցում ելակետն իմպերիալիստական ձգտումն էր՝ միայն թե չվնասվեն իր իմպերիալիստական շահերը. «Եթե հայերին վիճակված է մեռնել,— ցինիկորեն հայտարարում էր Ավստրո-Հունգարիայի արտաքին գործերի մինիստր Ա. Գոլուխովսկին,— նրանք պետք է մեռնեն»⁷¹։ Ավստրո-Հունգարիան Հայկական հարցում համերաշխ գործելով Անգլիայի հետ, պատրաստակամությամբ պաշտպանեց նաև սուլթանի վրա ճնշում գործադրելու նպատակով թուրքական ջրերի տերությունների ռազմական նավատորմ մտցնելու անգլիական կառավարության առաջարկը⁷², Իրավացի է Ա. Կուրդիյանը, գրելով, որ Ավստրո-Հունգարիայի այդ գործելակերպի շարժառիթը բոլոր դեպքերում ոչ թե թուրքական բաշխողությունների ղեկավարման Արևմուտյան Հայաստանի աշխատավորության փրկության, այլ Անգլիայի հետ ընդդեմ Ռուսաստանի ընդհանուր տախտիկայի մշակման ձգտումն էր⁷³։

Նվրոպական մեծ տերություններն արևմտահայության ազատագրական ձգտումները հիմնականում օգտագործում էին միմյանց դեմ մղվող պայքարում։ Վ. Ի. Լենինը բացահայտել է իմպերիալիստական տերությունների քաղաքականության այդ կողմը։ «Իմպերիալիստական տերություններից մեկի դեմ մղված ազգային-ազատագրական պայքարը,— գրել է նա,— հայտնի պայմաններում կարող է օգտագործվել մեկ այլ, «մեծ» տերության կողմից նույն իմպերիալիստական նպատակներով»⁷⁴։ Երբեմն հասարակական կարծիքի ճնշման տակ, առաջին հերթին նկատի ունենալով իրենց շահերը, տերությունները ռեֆորմների ծրագրեր էին մշակում ու ներկայացնում թուրքական կառավարությանը, որից հետո բարենդությունը դիտում էին, թե Բ. Դուռն ինչպես է կոտորում իր քրիստոնյա հպատակներին։ Նվրոպական դիվանագիտությունը Թուրքիայից բարենորոգումներ էր պահանջում,— գրել է Ջ. Կիրակոսյանը,— այդ բարենորոգումները խանգարելու համար»⁷⁵։ Քննարկելով Մերձավոր արևելքում մեծ տերությունների հետապնդած շահերի ու դրանից բխող հակամարտությունների խնդիրը, արևմտահայության մեծ ողբերգությանը նրանց հանցակից լինելը, Մ. Խվոստովը գրել է. «Բեռլինի կոնգրեսը հայ ժողովրդի զգալի մասը թողեց թուրքերի լծի տակ։ Պատմությունը ցույց տվեց, որ կապիտալիստական տերությունների այդ որոշումը ճակատագրական եղավ թուրքահայերի համար. այն նրանց մատնեց ֆիզիկական ոչնչացման»⁷⁶։ Արևմտյան Հայաստանը արևմտյան մեծ տերությունների «ողորմությամբ» թուրքական տիրապետության տակ թողնելը և իրենց գաղութատիրական շահերի նպատակին հակակական հարցը» առուծախի առարկա դարձնելը,— գրել է Ջ. Գրիգորյանը.— դարձավ արևմտահայության բնաջնջման, հրաշքով կենդանի մնացած բեկորների բռնազաղթների ու աշխարհափյուռ թշվառ պանդրխտության, մեծ ողբերգության գլխավոր պատճառներից մեկը»⁷⁷։

⁷⁰ Նույն տեղում, № 2568։

⁷¹ А. Е. Кургиян, Армянская проблема в международных отношениях (автореферат докт. диссертация), М., 1969, с. 26.

⁷² ЗУУՀ ԳԱ «Լրաբեր», 1983, № 1, էջ 30։

⁷³ А. Е. Кургиян, Европейская дипломатия и армянский вопрос в 90-х годах XIX в. («Ученые записки Московского областного пед. института им. Н. К. Крупской», т. 191, вып. 9, М., 1968, с. 223).

⁷⁴ Վ. Ի. Լենին, ՆԺԺ, հ. 27, էջ 313։

⁷⁵ Ջ. Կիրակոսյան, Առաջին համաշխարհային պատերազմը և արևմտահայությունը, Երևան, 1965, էջ 17։

⁷⁶ «История дипломатии», т. 2, М., 1963, с. 333.

⁷⁷ Ջ. Տ. Գրիգորյան, Արևելյան Հայաստանի միացումը Ռուսաստանին և նրա պատմական նշանակությունը, Երևան, 1978, էջ 305—306։

Այսպիսով, 1878 թ. Բեռլինի կոնգրեսից հետո սուլթանական կառավարությունը իմպերիալիստական խոշոր տերությունների թողալովյամբ ծրագրեց և գործնականորեն իրագործեց արևմտահայության կոտորածը։ Մերձավոր արևելքում մեծ տերությունների զավթողական շահերը և Հայկական հարցում նրանց դիվանագիտական շահատակությունները ազատ արձակեցին սուլթան Աբդուլ Համիդ II-ի ձեռքերը՝ 1893—1896 թթ. ընթացքում կոտորելու 300.000—350.000 անմեղ հայերի, արևմտահայության դեմ նյութելու դաժան ոճիրներ։

ПОЛИТИКА СУЛТАНСКОЙ ТУРЦИИ В ЗАПАДНОЙ АРМЕНИИ И ВЕЛИКИЕ ДЕРЖАВЫ

(90-ые годы XIX в.)

ПОГОС СИМОНЯН

Резюме

После Берлинского конгресса 1878 г. султанское правительство при попустительстве великих держав запланировало и на деле осуществило резню западных армян. Захватнические интересы великих держав на Ближнем Востоке и их дипломатические ухищрения в Армянском вопросе развязали руки султану Абдулу-Гамиду II, в 1893—1896 гг., организовавшему резню западных армян, жертвой которой стали 300—350 тыс. мирных жителей.